

# Maid toohâđ, jis šleđgâpotkâ oolât?

**Motomin pááikán puáhtá puáttid šleđgâpotkâ.**

**Šleđgâpotkâ pištá táválávt tuše uánihis puudâ, ijge tast taarbâš huolâstuđ.**

**Motomin šleđgâpotkâ puáhtá pišteđ kuhheeb ääigi.**

**Luuvá taan ravvust, mii šleđgâpoodhâ ääigi tábáhtuvá já maht tun puávtáh varriidáttâđ šleđgâpootkân.**

Šleđgâpoodhâ ääigi šleđgârustigeh iä tooimâ.

Ovdâmerkkân čuovah, oommân já jienâskäppi iä tooimâ.

Čääci ij puáđi hanast teikkâ riššoost.

Hiivsig ij uážu keessid.

Pasâttâščäcituálvoi ij uážu lyeštid čääsi.

Lieggiittâš ij tooimâ.

Puhelin- já nettiohtâvuodah potkâneh,

jis šleđgâpotkâ juátkoo suullân kyehti tiijme.

Ovdâmerkkân stoormah,

tulveh já muotâ pyehtih tovâttid šleđgâpoodhâid.

Meiddei teknisâš suujah teikkâ koskâpuddâšâš


šleđgâvânuotâ pyehtih tovâttid poodhâid.

Šleđgâpoodhâ viggeh tivvood rotoi,

jiehke tun taarbâš almottiđ tast kuussân.

Jis tun lah huolâstum, te tun puávtáh kojâdiđ niävu

ovdâmerkkân tuu aldaulmust teikkâ uápis ráánjást.



## Varriidât šleđgâpootkân muuneeld

Hárjuttâl muuneeld, maht tun tooimah šleđgâpoodhâ ääigi.  
Hommaa pááikán päikkivääri ađai káálvuid,  
main lii ävkki šleđgâpoodhâ ääigi.  
Täärhist, ete tun kaavnah káálvuid, ko šleđgâpotkâ álgá.




Hommaa pááikán päikkivääri ađai čuávuvâš káálvuid:

- lummâlamppu já kinttâleh teikkâ čuovah,  
moh tuáimih patterijguin
- suullân 5 litter puttâlčääci jyehi ässei päähist
- väripurrâmuš, maid tun puávtáh puurrâđ kolmâsin
- lieggâ pihtâseh, ullosuháh já loovdâ
- värivirdekäldee.

Jis tun anah išeniävuid, moh tarbâšeh šleđgâ,  
te smietâ muuneeld, maht tun tooimah šleđgâpoodhâ ääigi.  
Piergiih-uv tun váhá ääigi išeniävuttáá  
teikkâ puáhtá-uv tom kevttiđ teikkâ luođiđ värivirdijn.

Smietâ, kiäst tun uážuh iše, ko tarbâšah tom.  
Soovâ ovdâmerkkân ránnjain teikkâ uáppásáin,  
maht tuoi toimâvettee, jis šleđgâpotkâ oolât.  
Smietâ meid, maht tun puávtáh viettiđ ääigi  
vuohâsávt šleđgättáá.

Tun puávtáh luuhâđ varriidâtmist eenâb  
nettičuottâsâst [www.72tuntia.fi](http://www.72tuntia.fi).  
Sijđostâh lii almoskielâlâš.



Ovdâmeerhah päikkiväärist.

## Návt tun piergiih šleđgâpoodhâ ääigi

Šleđgâpotkâ pištá táválávt tuše uánihis puudâ.  
Tun puávtáh vyerdiđ šleđgâpoodhâ nuuhâm ráávhust,  
ko tun muštáh čuávuvâš ravvuid.


- Čaaskât šleđgârustigijd,  
tegu hellá, oommân já káhvivuošan.  
Kiddii čäcihanaid.
- Jis pääihist lii sevŋâd,  
te ane lummâlaampu já čuovâid,  
moh tuáimih patterijguin.
- Juuvâ puttâlčääci já eres juhâmušâid,  
maid tun lah uástám käävpist.
- Puurâ purrâmuš, mon tun jieh taarbâš kokkiđ.  
Tun puávtáh puurrâđ ovdâmerkkân leeibi, muroid,  
pähkiniđ, ruonnâsijd já heđâlmijd.  
Purrâmušah jienâskäapist já puolâščuhteest siäiluh,  
ko tun jieh leehâ uuvvâid tuušij tiet.
- Káárvut lieggâsávt já ane lovduid,  
jis šodâškuát koolmâs.  
Toolâ laasâid já olgouuvvâid kiddâ.

Jis tun lah huolâstum teikkâ tarbâšah iše,  
te tun puávtáh keččâliđ suáittiđ tuu aldaulmui.  
Jis puhelin ij tooimâ,  
te tun puávtáh kojâdiđ iše ovdâmerkkân uápis ráánjást.


Šleđgâpoodhâ ääigi tun uázuh virgálâš tiäđu radiost,  
mii tuáimâ patterijguin.



Čaaskât šleđgârustigijd já kiddii čäcihanaid.



Tun puávtáh ovdâmerkkân juuhâđ puttâlčääsi já puurrâđ vuojâleeibijd.



Káárvut lieggâsávt já toolâ laasâid kiddâ.

